

建水州志卷之十

歷代

宸翰

易曰天風垢后以施命誥四方記曰王言如絲
王言如綸故典謨所垂天章聖藻千古維昭建
自肄籍以來經元與明玉音接下普被邊徼惟
我

朝文誥獨邁往古

列聖汗號緯地經天

建水州志

卷之十

宸翰

皇上睿慮益周煌煌天語焜耀詳切帝典王謨於
今為盛凡我臣工士庶敢不肅承祗守歟至名
臣請奏條議皆關大典并彙之簡端以光志乘

御製

元成宗追封至聖詔

蓋聞先孔子而聖者非孔子無以明後孔子而
聖者非孔子無以法所謂祖述堯舜憲章文武
儀範百王師表萬世者也朕纂承丕緒敬仰休
風循治古之良規舉追封之盛典加號



大成至聖文宣王遣使闕里祀以大牢於戲父子
之親君臣之義永惟聖教之尊天地之大日月
之明奚罄名言之妙尚資神功助我皇元
明

太祖諭約

孝順父母

尊敬長上

和睦鄉里

教訓子孫

各安生理

勿作非爲

頒宋高宗戒石銘於州署

爾俸爾祿

民膏民脂

建水州志

卷之十

宸翰

二

下民易虐

上蒼難欺

國朝

世祖章皇帝條教生員臥碑

順治九年頒

朝廷設立學校選取生員免其丁糧厚以廩膳設
學院學道學官以教之各衙門官以禮相待全
要養成賢才以供

朝廷之用諸生各當上報

國恩下立人品所有條教開列於後

一生員之家父母賢智者子當受教父母愚魯

或有非爲者子旣讀書明理當再三懇告使
父母不陷於危亾

一生員立志當學爲忠臣清官書史所載忠清
事蹟務須互相講究凡利

國愛民之事更宜留心

一生員居心忠厚正直讀書方有實用出仕必
作良吏若心術邪刻讀書必無成就爲官必
取禍患行害人之事往往自殺其身常宜思
省

建水州志

卷之十 宸翰

三

一生員不可干求官長交結勢要希圖進身若
果心善德全上天知之必加以福

一生員當愛身忍性凡有司官衙門不可輕入
如有切己之事止許家人代告不許干與他
人詞訟他人亦不許牽連生員作証

一生員當尊敬先生若講說皆須誠心聽受如
有未明從容再問無妄行辨難爲師者亦當
盡心教訓勿致怠惰

一軍民一切利弊不許生員上書陳言如有一

言建白以違制論黜革治罪

一生員不許糾黨立盟結社把持官府武斷鄉

曲所作文字不許妄行刊刻違者聽提調官

治罪

聖祖仁皇帝諭

康熙十九年頒

第一條敦孝弟以重人倫

第二條篤宗族以昭雍睦

第三條和鄉黨以息爭訟

第四條重農桑以足衣食

建水州志

卷之十

宸翰

四

第五條尚節儉以惜財用

第六條隆學校以端士習

第七條黜異端以崇正學

第八條講法律以儆愚頑

第九條明禮讓以厚風俗

第十條務本業以定民志

第十一條訓子弟以禁非為

第十二條息誣告以全良善

第十三條戒窩逃以免株連

第十四條完錢糧以省催科

第十五條聯保甲以弭盜賊

第十六條解讎忿以重身命

至聖先師孔子贊并序

康熙二十五年

蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位

建水州志

卷之十

宸翰

五

窮而在下秉刪述之權明道之聖人也行道者勳業炳於一朝明道者教思周於百世堯舜禹湯文武之後不有孔子則學術紛淆仁義壅塞斯道失傳也久矣後之人而欲探二帝三王之心法以爲治國平天下之準其奚所取衷焉然則孔子之爲萬古一人也審矣朕巡省東國謁祀闕里景企茲深敬摛筆而爲之贊曰

清濁有氣剛柔有質聖人參之人極以立行著習察舍道莫由惟皇建極惟后綏猷作君作師

垂統萬古曰惟堯舜禹湯文武五百餘歲至聖
挺生聲金振玉集厥大成序書刪詩定禮正樂
既窮象繫亦嚴筆削上紹往緒下示來型道不
終晦秩然大經百家紛紜殊途異趨日月無踰
羹牆可晤孔子之道惟中與庸此心此理千聖
所同孔子之德仁義中正秉彝之好根本天性
庶幾夙夜勗哉令圖溯源洙泗景躅唐虞載歷
庭除式觀禮器摛毫仰贊心焉遐企百世而上
以聖爲歸百世而下以聖爲師非師夫子惟師

建水州志

卷之十

宸翰

六

於道統天御世惟道爲寶泰山巖巖東海泱泱
牆高萬仞夫子之堂孰窺其藩孰窺其徑道不
遠人克念作聖

顏子贊

康熙二
十八年

聖道早聞天資獨粹約禮博文不遷不貳一善
服膺萬德來萃能化而齊其樂一致禮樂四代
治法兼備用行含藏王佐之器

曾子贊

洙泗之傳魯以得之一貫曰唯聖學在茲明德

新民止善爲期格致誠正均平以推至德要道
百行所基纂承統緒修明訓辭

子思子贊

於穆天命道之大原靜養動察庸德庸言以育
萬物以贊乾坤九經三重大法是存篤恭慎獨
成德之門卷之藏密擴之無垠

孟子贊

哲人旣萎楊墨昌熾子輿闢之曰仁曰義性善
獨聞知言養氣道備堯舜學屏功利煌煌七篇

建水州志

卷之十

宸翰

七

並垂六藝孔學攸傳禹功作配

耕織圖序

康熙三十五年春二月頒

朕早夜勤志研求治理念生民之本以衣食爲

天嘗讀豳風無逸諸篇其言稼穡蠶桑織悉具

備昔人以此被之管絃列於典誥有天下國家

者洵不可不雷連三復於其際也西漢詔令最

爲近古其言曰農事傷則饑之本也女紅害則

寒之源也又曰老者以壽終幼孤得遂長欲臻

斯理者舍本務其何以哉朕每巡省風謠樂觀

農事於南北土疆之性黍稷播種之宜節候蚤
晚之殊蝗蝻捕治之法素愛諮詢知此甚晰聽
政時恆與諸臣工言之於豐澤園之側治田數
畦環以溪水阡陌井然在目桔槔之聲盈耳歲
收嘉禾數十鍾隴畔樹桑傍列蠶舍浴繭練絲
恍然如茅簷蔀屋因構知稼軒秋雲亭以臨觀
之古人有言衣帛當知織女之勞食粟當念農
夫之苦朕惓惓於此至深且切也爰繪耕織圖
各二十三幅朕於每幅製詩一章以吟咏其勤

建水州志

卷之十

宸翰

八

苦而書之於圖自始事迄終事農人胼手胝足
之勞蠶女繭絲機杼之瘁咸備極其情狀復命
鏤板流傳用以示子孫臣庶俾知粒食維艱投
衣匪易書曰惟土物愛厥心臧庶於斯圖有所
感發焉且欲令寰宇之內皆敦崇本業勤以謀
之儉以積之衣食豐饒以共躋於安和富壽之
域斯則朕嘉惠元元之至意也夫

訓飭士子文

康熙四
十一年

國家建立學校原以興行教化作育人才典至

渥也朕臨馭以來隆重師儒加意庠序近復慎
簡學使釐剔弊端務期風教修明賢才蔚起庶
幾樸棧作人之意乃比來士習未端儒效罕著
雖因內外臣工奉行未能盡善亦由爾諸生積
痼已久猝難改易之故也茲特親製訓言再加
警飭爾諸生其敬聽之從來學者先立品行次
及文學學術事功源委有敘爾諸生幼聞庭訓
長列宮牆朝夕誦讀寧無講究必也躬修實踐
砥礪廉隅敦孝順以事親秉忠貞以立志窮經

建水州志

卷之十

宸翰

九

考義勿雜荒誕之談取友親師悉化憍盈之氣
文章歸於醇雅毋事浮華軌度式於規繩最防
蕩軼子矜佻達自昔所譏苟行止有虧雖讀書
何益若夫宅心弗淑行已多愆或蜚語流言脇
制官長或隱糧包訟出入公門或唆撥姦猾欺
孤凌弱或招呼朋類結社要盟乃如之人名教
不容鄉黨弗齒縱倖脫褫朴濫竊章縫返之於
衷能無愧乎况乎鄉會科名乃掄才大典關係
尤鉅士子果有真才實學何患困不逢年顧標

榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用加惠爾等故不禁反復惓惓茲訓言頒到爾等務共體朕心恪遵明訓一切痛加改省爭自濯磨積行勤學以圖上進國家三年登造束帛弓旌不特爾身有榮

建水州志

卷之十

宸翰

十

卽爾祖父亦增光寵矣逢時得志寧事他求哉若乃視爲具文玩愒勿做毀方躍冶暴棄自甘則是爾等冥頑無知終不能率教也旣負栽培復干咎戾王章具在朕不得爲爾寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業弗修咎亦難追勿謂朕言之不預也爾多士尙敬聽之哉

今

上聖諭廣訓序 雍正二年頒

書曰每歲孟春適人以木鐸徇於路記曰司徒修六禮以節民性明七教以興民德此皆以敦本崇實之道為牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外與仁講讓革薄從忠共成親遜之風永享昇平之治故

建水州志 卷之十 宸翰 十一

特頒上諭十六條曉諭八旗及直省兵民人等自綱常名教之際以至於畊桑作息之間本末精粗公私鉅細凡民情之所習皆

睿慮之所周視爾編氓誠如赤子
聖有謨訓明徵定保萬世守之莫能易也朕纘承大統臨御兆人以

聖祖之心為心以
聖祖之政為政夙夜龜勉率由舊章惟恐小民遵信奉行久而或怠用申誥誠以示提撕謹將

上諭十六條尋繹其義推衍其文共得萬言名曰
聖諭廣訓旁徵遠引往復周詳意取顯明語多直樸
無非奉

先志以啓後人使羣黎百姓家喻而戶曉也願爾兵
民人等仰體

聖祖正德厚生之至意勿視爲條教號令之虛文共
勉爲謹身節用之庶人盡除夫浮薄囂凌之
陋習則風俗醇厚家室和平在朝廷德化樂
觀其成爾後嗣子孫並受其福積善之家必
有餘慶其豈或爽哉

建水州志 卷之十 宸翰 十三

平定青海告成太學碑 雍正二年五月十七日頒

國家受

天眷命撫臨八極日月所照罔不臣順遐邇乂安兆
人蒙福乃有羅卜藏丹津者其先世固始汗自
國初稽首歸命當時使臣建議畀以駐牧之
地其居雜番羗密近甘涼我

皇考聖祖仁皇帝睿慮深遠每廛於懷旣

親御六師平定朔漠威靈所加青海部落札什巴圖
兒等震聳承命

聖祖仁皇帝固沛殊恩封爲親王兄弟八人咸賜爵
祿羈縻包容示以寬大而狼心梟性不可以
德義化三十年來包藏異志朕紹登寶位優
之錫賚榮其封號尙冀革心輯寧部衆而羅
卜藏丹津昏謬狂悖同黨吹拉克諾木齊阿
爾布坦溫布藏巴札布等實爲元惡謂國家
方弘浩蕩之恩不設嚴密之備誕敢首造逆

建水州志

卷之十 宸翰

三

謀迫脅番羌侵犯邊城反狀彰露用不可釋
於天誅遂命川陝總督太保公年羹堯爲撫
遠大將軍聲罪致討以雍正元年十月師始
出塞自冬涉春屢破其衆凡同叛之部落戈
鋌所指應時摧敗招降數十萬衆又降其貝
勒貝子公台吉等二十餘人朕猶憫其蠢愚
若悔過思愆束手來歸尚可全宥而怙惡不
悛負險抗違乃決剪滅之計以方略密付大
將軍羹堯調度軍謀簡稽將士用四川提督

岳鍾琪爲奮威將軍於仲春初旬禡牙徂征
分道深入搗其窟穴電掃風驅搜剔巖阻賊
徒倉皇糜潰窮蹙失據羅卜藏丹津之母及
逆謀渠魁悉就俘執擒獲賊衆累萬牲畜軍
械不可數計賊首逃遁我師踰險窮追獲其
輜重人口殆盡羅卜藏丹津牙身易服竄匿
荒山殘喘待斃自二月八日至二十有二日
僅旬有五日軍士無久役之勞內地無轉輸
之費克奏膚功永清西徼三月之朔奏凱旋

建水州志

卷之十

宸翰

古

旅饒鼓喧轟士衆訢喜四月十有二日以倡
逆之吹拉克諾木齊等三人獻俘

廟

社受俘臣民稱慶伏念

聖祖仁皇帝威靈震於遐方福慶流於奕葉用克彰
皇六師殄滅狂賊行間將士亦由感激

湛恩厚澤爲朕踴躍用命斯役也芟夷凶悖綏靖番
羗俾烽燧永息中外人民胥享安阜實成

先志以懋丕績廷臣上言稽古典禮出征而受成

於學所以定兵謀也獻馘而釋奠於學所以
告凱捷也宜刊諸珉石碣於太學用昭示於
無極遂爲之銘曰

天有雷霆聖作弧矢輔仁而行威遠寧邇維
此青海種類實繁錫之茅土列在藩垣被我
匪光位崇祿富負其阻遐禍心潛構恭惟

聖祖慮遠智周睠念荒服綏撫懷柔朔野旣清西陲
攸震爵號游加示之恩信如何凶狡造謀逆
天鼓動昏憝寇侵於邊惟彼有罪自干天罰

建水州志

卷之十

宸翰

十五

桓桓虎貔爰張九伐王師卽路冬雪初零日
耀組練雷響輦鉦蠢茲不順敢逆戎旅奮張
螳臂以當齊斧止如山岳疾如雨風我戰則
克賊壘其空彼昏終迷曾不悔戾當翦而滅
斯焉決計厲兵簡將往搗其巢踰歷嶽嶇坦
若坳郊賊棄其家我繫而獲牛馬谷量噐仗
出積蹇兔失窟何所逋逃枯魚遊釜假息煎
熬師以順動神明所服旬日凱歸不疾而速
殪彼逆謀懸首藁街獻俘成禮金鼓調諧西

域所瞻此惟雄特天討旣申羣酋惕息橐戈
偃革告成辟雍聲教遐暨萬國來同惟我

皇祖親平大漠魏功煥文邁桓軼酌流光攸久視此
銘辭繼志述事念茲在茲

雍正元年三月十五日奉

上諭內閣禮部

至聖先師孔子道冠古今德參天地樹百王之
模範立萬世之宗師其爲功於天下者至矣
而水源木本積厚流光有開必先克昌厥後

建水州志

卷之十

宸翰

六

則聖人之祖考宜膺崇厚之褒封所以追溯
前徽不忘所自也粵稽舊制孔子之父叔梁
公於宋眞宗時追封啓聖自宋以後歷代遵
循而叔梁公以上則向來未加封號亦未奉
祀祠庭朕仰體

皇考崇儒重道之盛心修崇德報功之典禮意欲

追封五代並享烝嘗用伸景仰之誠庶慰羹
牆之慕內閣禮部可會同確議具奏欽此該

臣等謹議

至聖先師孔子秉生安之至德集金玉之大成
道備一身教垂萬葉歷代雖有尊崇之禮而
自啓聖公以上封號未加祀典未備我
皇上作君作師傅心傳道孝思不匱弘施錫類之
恩慕德無窮推廣報功之典以孔子爲百代
之師晉先世以尊榮之號

特頒諭旨追封五代並享丞嘗此誠曠古未有之
異數也臣等謹遵典禮詳考世系

孔子之五世祖木金父公自宋遷魯始姓孔氏

建水州志

卷之十

宸翰

七

高祖祈父公會祖防叔公祖伯夏公父叔梁
公凡五代除叔梁公應照舊封啓聖外木金
父公至伯夏公四代皆應追封公爵臣等謹
擬木金父公追封爲肇聖公祈父公追封爲
裕聖公防叔公追封爲詒聖公伯夏公追封
爲昌聖公卽於啓聖公祠內安設神牌按昭
穆位次每年春秋致祭其牲牢酒醴籩豆簋
簋每神位前各照啓聖公例陳設其啓聖祠
向係專祀叔梁公故以啓聖公爲名今

聖廟異數合祀五代擬更名爲崇聖祠俟

命下之日將追封字樣通行國子監順天府直省

府州縣衛學及衍聖公一體遵行至欽奉

上諭一道應頒行國子監及闕里勒石廟庭以光

盛典其追封誥命交與內閣撰擬國子監之啓

聖祠改造匾額添設神牌祭器等項交與工

部俟造完之日交欽天監擇吉入廟其餘各

省行令該地方官各行辦理可也等因於雍

正元年三月二十七日題四月十八日大學

建水州志

卷之十

宸翰

六

士馬等啓奏摺本奉

上諭五倫爲百行之本天地君親師人所宜重而

天地君親之義又賴師教以彰明自古師道

無過於孔子誠首出至聖也我

皇老

道超軼千古凡尊崇孔子典禮無不

備至朕蒙

考教育自幼讀書心切景仰欲再加尊崇更無

可增之處故勅部追封孔子以上五代今部

議封公上考前代帝王皆有推崇之典唐明

皇封孔子爲文宣王宋真宗加封至聖文宣王聖父叔梁紇爲齊國公元加封孔子爲大成至聖文宣王加封齊國公爲啓聖王至明嘉靖時猶以王係臣爵改稱爲至聖先師孔子改聖王爲聖公王公雖俱屬尊稱朕意以爲王爵較尊孔子爲五世應否封王之處着問諸大臣具奏欽此該_臣等會議得明倫閣教治世之大經崇德報功右文之盛典歷稽史册紀載之文皆有推尊孔子之禮至

建水州志

卷之十

宸翰

九

聖祖仁皇帝重道崇儒典章明備我

皇上因心仁孝好古敏求統道法之淵源以光大爲繼述謂倫常爲百行之本原至聖立萬世之師表

特諭追封五代典禮以極優隆猶以公爵之尊未若王爵復降

諭旨廣賜諮詢_臣等欽承之下深服

聖裁允當衆議僉同請自叔梁公以上至木金父公凡五代并追封爲王爵謹擬追封木金父

公爲肇聖王祈父公爲裕聖王防叔公爲詒
聖王伯夏公爲昌聖王叔梁公爲啓聖王入
廟之日國子監及闕里各遣大臣一員讀文
祭告祭文翰林院撰擬祭品照例備辦餘俱
照原議仍將追封王爵

上諭一并頒發勒石可也

諭知州知縣朕惟國家首重吏治爾州牧縣令乃
親民之官吏治之始基也貢賦訟獄爾實司
之品秩雖卑職任綦重州縣官賢則民先受

建水州志

卷之十

宸翰

十

其利州縣官不肖則民先受其害膺茲任者
當體朝廷惠養元元之至意以愛民爲先務
周察蒞屋綏輯鄉里治行果有其實循卓自
有其名非內聚賄而外干譽謂之名實兼收
也全省吏治如作室然督撫其棟梁也司道
其垣墉也州縣其基址也書云民惟邦本本
固邦寧夫所以固邦本者在吏治而吏治之
本在州縣苟州縣之品行不端猶基不立則
室不固庸有濟乎

考臨御六十一年灼知州縣之重特行引見咨
詢明試至詳至慎其有廉能之員每不次超
擢以示鼓舞今海內羣黎皆

皇考所懷保朕膺

宗社重寄思續

皇考之治功惟爾州縣具有父母斯民之責其爲
朕立之基址以固邦本焉誠能潔已奉公實
心盡職一州一縣之中興仁興讓教孝教忠
物阜民安刑清訟簡朕將升之朝宁用作股

建水州志

卷之十

宸翰

三

肱如或罔念民瘼恣意貪婪或腴削肥家或
濫刑逞虐或借刻以爲清或恃才而多事或
諂媚上司以貪位或任縱胥吏以擾民或徇
私逞欲以上虧國帑王章具在豈爾貸與更
有任州縣時私肥己橐而漫云且俟顯要方
立名節者其與初市清名晚而改操之人何
以異哉至於錢糧關係尤重絲毫顆粒皆百
姓之膏脂增一分則民受一分之累減一分
則民霑一分之澤前有請暫加火耗抵補虧

空帑項者

皇考示諭在廷不允其請爾諸臣共聞之矣今州縣火耗任意加增視爲成例民何以堪乎嗣後斷宜禁止或被上司察核或被科道糾參必從重治罪決不寬貸夫欲清虧空之源莫如節儉正直節儉則用無不足正直則上官不可干以私若朕小民之生以飽上官之貪欲冒不測之罪以快一時之奢侈豈砥礪廉隅爲民父母之道乎爾州縣等官其恪共乃

建水州志

卷之十

宸翰

三

職毋貽罪戾勿謂地遠官卑朕不及察特諭諭直省督撫等官朕惟撫養元元之道足用爲先朕自臨御以來無刻不履念民依重農務本業已三令五申矣但我國家休養生息數十年來戶口日繁而田土止有此數非率天下農民竭力耕耘兼收倍穫欲家室盈寧必不可得周官所載巡稼之官不一而足又有保介田畯日在田間皆爲課農設也今課農雖無專官然自督撫以下誰不兼此任也其各

督率有司悉心相勸并不時咨訪疾苦有絲毫妨於農業者必為除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化為勤矣在舍旁田畔以及荒山不可耕種之處度量土宜種植樹木桑柘可以飼蚕棗栗可以佐食梓桐可以資用卽榛楛雜木亦足以佐炊爨其令有司督率指畫課令種植仍嚴禁非時之斧斤牛羊之踐踏奸徒之竊盜亦為民利不

建水州志

卷之十

宸翰

三

小至孳養牲畜如北方之羊南方之豕牧養如法乳字以時於生計不無裨益總之小民至愚經營衣食非不迫切而目前自然之利反多忽略所賴親民之官委曲周詳多方勸導庶使踴躍爭先人力無遺而地利始盡不惟民生可厚風俗亦可還淳爾督撫等官各體朕惓惓愛民之意實心奉行倘視為具文苟且塗飾或反以擾民則尤其不可也特諭
雍正二年二月初九日

耕藉田

上諭直省總督巡撫等自雍正二年以來朕躬耕藉田而藉田之中每歲必產嘉穀上年自雙穗至於九穗今歲則自雙穗至於十三穗在廷諸臣及京都耆庶皆驚訝以爲奇朕之宣示於衆者並非矜詡誇張以爲祥瑞蓋實有見於天人感召之理捷於影響而朕敬天之心至誠至切願與大小臣工共勉之也稼穡爲天地之實實生民之命攸關我

建水州志

卷之十

宸翰

十四

聖祖仁皇帝臨御六十餘年無刻不以重農力穡爲先務仰觀天時俯察地理辯土性而課人功咨雨暘而防旱潦旰食宵衣偶遇雨澤愆期聖心憂勞之切侍側臣子皆惶悚不寧所以爲萬民謀粒食者至矣蓋矣朕瞻仰日親者四十餘年今纘承大統竭誠效法念切民依每年虔祀

先農躬耕帝藉仰蒙

上天眷佑疊錫嘉禾信而可徵纖毫不爽是以特

頌

諭旨令各省守土者舉耕藉之禮為萬方百姓
祈禱秋成今見各省督撫奉報前來處處風
雨均調春麥秋禾並登豐稔雖邊遠荒僻之
地亦慶有秋惟直隸湖廣安徽數州縣近水
最低之處常年被淹者略有浸注亦不為災
是今歲可稱大有年矣朕感

上天之垂慈慶下民之受福而推求其故良由今
年各省初耕藉田各該有司自然小心敬慎

建水州志

卷之十

宸翰

三

齋戒虔誠是以感格

蒼蒼而獲此盈寧之錫倘從此益加敬謹不懈初
心則歲歲屢豐可以預必爾督撫等可通曉
諭所屬軍民當凜

帝鑒之匪遙勿視耕田為故事永矢敬恪以迓
八和天下臣民受福斯朕之福也思之慎之毋忽

朕言特諭

奏議

增解額奏疏

巡撫 石文晟

為遐方文教大開

盛代賓興宜廣乞恩題增解額以溥

皇仁以弘雅化事奉府道司 督撫部院憲檄准

禮部等衙門會議得 雲南巡撫石 疏稱

滇居天末昔以士子甫離兵燹不暇詩書文

風未盛今蒙

皇上右文教養兼摯雲蒸豹變實繁有徒禮闈會

建水州志

卷之十 奉議

三

試將四川雲南分為中左四川取中四十二

名雲南取中二十七名同一中左取額懸殊

相應請照四川之額遴取四十二名以勵邊

地人才至文武並重自應並請

洪恩一例廣額等因具題前來查本年三月內

貴州巡撫閻興邦為同文之教澤已久遐方

之人才漸盛等事一疏禮部以無庸議題覆

奉

旨貴州取中舉人着照該撫所題增額欽遵在案

今該撫所題雲南省文武鄉試增額之處亦應如其所請照四川例取中四十二名可也具題奉

旨依議

請減屯賦疏

石文晟

題為密陳屯糧之重仰祈

睿裁以廣

皇仁事竊惟經國必先於裕課體野端在乎足民故正賦貴自充積而民瘼亦當痾瘵臣本庸

建水州志

卷之十

奏議

七

陋世受國恩蒙

皇上曠典以郡守末吏不次優陞特簡滇撫叨此邊疆重任敢不竭盡駑鈍以報高厚故自蒞任以來咨詢地方利弊體察吏治民生其間之生聚殷繁安藝樂業熙熙皞皞如入時雍之世此皆

皇上聖德滂流所致惟是猶有重困於民者不敢不以上聞也查滇省屯政因明初沐英世鎮雲南將帶來官兵分作十分以三分差操七

分屯種卽以七分屯種之租以養三分操軍
此卽古之寓兵於農原非上倉糧米可比迨
我

朝定鼎順治十六年闢滇吳三桂遂將昔日之
租改爲額徵之賦及後變亂之時罔恤民艱
任意坐派致使各軍紛紛逃竄因而遺累存
丁典鬻賠納苦難殫述幸賴

皇上天威殄逆民得安全但浮糧過重仍困輸將
計恢復之後自康熙二十一年至二十七年

建水州志

卷之十

奏議

三

屯糧米穀等項歷年拖欠此非軍戶敢於頑
抗亦非各官不善催科總因糧額太重血比
難完業於康熙二十八年內經前督臣范署
巡撫石特疏

題請分年帶徵隨蒙

皇仁 特頒

上諭朕念雲南百姓前曾供億王師繼又遷移叛
屬家口運送勞瘁本年正賦輸將尚屬艱難
復令帶徵逋租必致益滋困累着將歷年所

欠屯賦銀七萬二千二百餘兩米麥等項十萬七百餘石盡行蠲免以示朕軫念民生至意欽遵在案則彼時題請帶徵早蒙聖恩隆重悉荷蠲除是此項屯糧徒有重額之名並無清完之益歷歷可考久在

皇上睿鑒中矣况各衛所久經裁歸有司是在前日猶存軍戶之名在今日則無軍民之別一切徭役自應一視同仁乃查通省民賦上則田糧最重者莫如河陽縣每畝八升一合八

建水州志

卷之十

奏議

三九

勺三抄其餘五六升以至四五合而止則地稅最重者亦莫如河陽縣每畝五升九合二勺一抄其餘三四升以至三四合而止及查屯田每畝則有七斗二升六斗八升五斗六升至四斗五六升不等屯地每畝亦有三斗八升至一斗五六升不等夫軍民田地阡陌相連肥磽相若天時人事耕鑿播種亦無不同以至輕之屯額比至重之民額尚有四五倍之數若較輕額則屯賦之與民額竟有十

倍之重所以屯軍終歲勤動種收之穀不遑
瞻顧父母妻子惟事納糧而究竟不能以一
畝之出全完一畝之額故康熙二十八年臣
叔石 撫滇時曾於奉

旨編輯全書案內將此屯糧重困敘入瀝陳未經
部覆而已後督撫臣未敢復請者蓋以

國用浩繁豈容遽議輕徭况各省屯糧皆重尤
不便獨為請減是以前撫臣王 不得已於

康熙二十九年有額恩減則貼墾之請也但

建水州志

卷之十

奏議

三

江浙等省屯軍現今領運且有船隻行月漕
米等項給膳滇省屯軍則無此項瞻養兼之
衛所既裁軍卽是民則與別省迥異况此軍
戶係沐氏帶來官兵並非發遣有罪之軍所
納正供似應與民一體矜恤臣於康熙二十
二年守開化時早已深悉今撫茲土見烟竈
相連林林總總生聚實繁大非昔日氣象此
雖邇年以來前督撫臣撫綏之力實沐

皇上柔遠弘恩所致惟此一項因吳逆作亂時各

軍多半逃竄殲逆之後前此逃丁或遭兵火
或戀他鄉間未回里以致遺糧賠累本以最
重之糧又復包賠逃戶日復一日重復更重
故於康熙二十八年以來仍舊歲歲不清每
遇

奏期各官俱愛功名竭蹶借墊者有之遇一陞
遷事故便束手無策百計哀求逢人募助洵
不可悉數也臣自入境以來日覩荒蕪田地
甚多百姓甚衆及抵任後披閱各屬詳驗報

建水州志

卷之十 奏議

三

墾無幾隨行飭催旋據百姓紛紛具呈熟糧
額重無力開墾懇請 題減復批司道查詳
所議僉同總欲爲民請 命臣思減賦薄稅
非臣子所敢輕議祇因多寡之數甚是不侔
苦樂之形異常各別今我

皇上恩同天地德邁唐虞頻年蠲賦不惜數千萬
金是恭逢 聖明在上今此民隱若不據實
上達負百姓卽負我

皇上矣况滇省僻處遐方係外域觀瞻之地不得

不冒昧陳情如荷

聖恩將此屯糧悉照河陽縣則例起科則不特現
在軍餘易於輸納卽未墾荒產臣自鼓勵各
地方官加意勸墾亦無不踴躍樂墾者也仍
將墾過數目隨卽具報按年科徵是以減賦
於今日安知不增賦於將來也理應恭疏
題請但發政施仁端望

皇上特霽洪恩臣何人斯敢以瀆 奏謹具密本
如果蕩蕩可採伏乞

建水州志

卷之十 奏議

三

皇上特頒 上諭或令臣等會查或 勅部臣議
覆則九州四海莫不頌

皇上端居深宮之中明見萬里之外共樂被深仁
厚澤於靡涯矣至此項額糧如邀 恩減而
通省兵食或有不敷則現有本省折徵米麥
等項可以仍徵本色撥給似可毋庸

睿懷也再查 題奏事件如不應密而密者有干
定例但此邊疆減糧重務相應密請

皇上睿裁字多逾格貼黃難盡可否允行伏乞

聖明全覽立賜

乾斷施行爲此具本謹密題請

旨

康熙三十四年五月初一日具題奉

旨着該部議奏

呈爲密陳屯糧之重等事奉 內閣照會內

開 云 以折本啓奏奉

旨伊所奏本內止言屯田雲南省有官田公田馬
場等項伊本內並未指明此等田地有無在

建水州志

卷之十 奏議

三

所奏屯田之內又此等田賦若行減額照民
田則例徵收雲南省應給兵餉可否足用爾
等以此行文詢問石文晟令伊詳悉籌算明
白具文回覆欽此照會巡撫作速查明具覆
可也等因奉此該職查得滇省屯糧額重軍
餘苦於輸將徒事血比終難清完以致有名
鮮實是以仰體

皇上特具密本冒瀆

天聽今奉

聖旨行查官

田公田馬場等項有無在所奏屯田之內又

此等田賦同前具文回覆職跪讀之下仰見

我

皇上廟算弘深無微不至務使民困甦而兵食足
職隨遵旨細查屯田官田公田公樣田公
種田馬料田首正田租穀田官租田以及屯
官各項地畝俱係沐氏自立名色另有一單
其每年所徵米麥穀菽豆悉在所奏屯賦之
內惟馬場草場軍舍丁差等項雖在屯賦之
內仍將額徵項下另款徵輸銀兩原無項畝

建水州志

卷之十

奏議

三

數目均不在請減之內以上各項田地前
因款目叢雜故疏內止言屯糧未將各項名
色逐一指明至於滇省制營歲需兵糧年該
一十五萬一千二百石遇閏加米一萬二千
六百石係於每年徵收民屯稅秋等項米二
十七萬一千八百餘石搭放尚有盈餘年復
一年積貯甚多若再全徵本色難免陳朽之
虞經前任督撫分別年分節次題請徵本
徵折在案康熙三十五年至三十八年又召

核請之期俟容另疏 題達外今以此折徵
米麥等項仍照舊例徵收本色內有屯賦原
徵稅糧等項折共米一十二萬九千九百六
石零折色銀四萬五千九百三十八兩零悉
照河陽縣民賦上中下三則起科共議減去
屯米七萬九千三百三十一石九斗零減去
銀一萬三千二百四十四兩零尚該徵正耗
折共米五萬五百七十四石零徵銀三萬二
千六百九十四兩零除此銀不計外將所徵

屯米搭同民賦正耗米一十四萬一千九百
三十八石零合算除足供本省兵糧一十五
萬一千二百石遇閏加米一萬二千六百石
由此計算是無閏每年該剩米四萬一千三
百一十二石零遇閏剩米二萬八千七百一
十二石零同裁曠小建積至四年之餘又足
供一歲之需統在

皇上格外施 恩俯念滇居天末係外域觀瞻之
地將此屯賦 特賜減免俾軍餘咸霑

德澤倘若不以此上中下三則爲例或悉照河陽縣上則起科應於原徵數內約減去銀九千三百八十一兩零減去米七萬三千三百一十四石零尚應徵銀三萬六千五百五十七兩零米五萬六千五百九十一石零其米同民賦米搭放本省兵糧外每年約共剩米四萬七千三百二十餘石以上各則應以何則爲例此

天高地厚之恩出自

建水州志

卷之十 奏議

三六

聖明非職所敢擅專也今奉前因遵將田地款目分則上中下三則同歲需兵糧各項數目理合造具約略清冊呈覆伏乞俯賜核明轉請俟奉

旨行滇之日卽欽遵

新舊另造科則細冊送

部查考合併聲明爲此具呈須至呈者

康熙三十四年八月初四日呈

准戶部咨爲密陳屯糧之重等事雲南清吏

司案呈杏得雲南巡撫石疏稱滇省民賦上則田地稅糧最重者莫如河陽縣其軍衛之屯賦比至重之民額竟有十倍之重云云而通省兵食或有不敷則折徵米麥可以仍徵本色等因具題九月二十七日奉

旨雲南屯田錢糧較民田額重數倍民人苦累嗣後屯田賦額着照河陽縣民田上則徵收該部知道欽此相應行文該撫將屯田額徵應減應徵總撤數目逐一造冊報部查核至本年錢糧已徵若干應令一併造冊報部查核可也

建水州志

卷之十 奏議

三

藉田說

總督 鄂爾泰

禮之有藉田也明仁也教孝也以天子之尊而必親耕則天下之爲農者孰不勤於耕此天子之仁愛天下而使之務本也所以明仁也以天子之尊而必親耕以供粢盛則天下之爲子者孰不勤於養此天子之孝先天下而使之養親也所以教孝也月令有之曰孟

春秋月天子乃以元日祈穀於上帝乃擇元辰天子親載耒耜措之於參保介之御閭帥三公九卿諸侯大夫躬耕帝藉天子三推三公五推卿諸侯九推還反執爵於太廟三公九卿諸侯大夫皆御命曰勞酒謹按元日上辛也元辰郊後吉日也日以干言辰以支言互文也則是耕藉之典當行於祈穀之後而同在孟春之月也考之周禮天官甸師掌帥其屬而耕耨王藉以時入以供粢盛此即天

建水州志

卷之十

奏議

三

子之藉田而甸師掌之者也然藉田不獨天子有之諸侯亦然祭義田天子爲藉千畝冕青紱而朱紱躬秉耒諸侯爲藉百畝冕而躬

秉耒以事天地山川先古以爲醴酪粢盛於是乎取之敬之至也是以千畝百畝之數此天子諸侯之視爲等級而其躬藉以致敬則一也祭統曰天子親耕於南郊以供粢盛王后蠶於北郊以供純服諸侯耕於東郊亦以供粢盛夫人蠶於北郊以供冕服諸侯非莫

耕也王后夫人非莫蠶也自致其誠信誠信之謂敬敬盡然後可以事神明此祭之道也是故南郊東郊之殊此天子諸侯之視爲分別而其親耕以致誠信則一也後世躬耕不行藉田漸廢周宣王不藉千畝號文公曰不可夫民之大事在農上帝之粢盛於是乎出民之蕃庶於是乎生事之共給於是乎在和協輯睦於是乎興財用繁殖於是乎始敦龐淳固於是乎成觀於此語而知藉田之義廣

矣大矣漢文帝二年詔曰夫農天下之本也其開藉田朕親率躬以給宗廟粢盛夫文帝漢之賢君也此禮既舉後之明主亦猶能踵而行之然唯天子行之畿內天子而外無復有議及者幾比於繁纓大輅之不可請近代郡縣大者不惟比於古公侯之國而小者亦遠勝於子男之邦則藉田之禮皆所當行乃不惟郡縣不惟督撫卽天子亦不能歲舉此禮卽使歲舉此禮京畿而外公卿大夫鮮有

能講明其義者今

聖天子特舉躬耕以爲天下先自督撫以及郡縣
州衛所等官凡任守土之司通行耕藉之禮
此誠千古未有之曠典也臣身爲總制兩省
封疆一身表率况滇黔在萬里之遠僻處蠻
荒一旦躬逢 盛舉不獨山農野叟實所未
聞卽縉紳士夫亦無從考覈臣不揣膚陋用
表彰其義著爲藉田先農二說宣示僚屬遍
告農夫使知我

建水州志

卷之十 奏議

四

聖天子本此仁孝之至推廣誠敬之思而其所以
爲天下臣民祈

天永命以同享夫萬邦屢豐之慶者其用意誠深
且遠可不共殫其仁孝誠敬之心以承

聖眷而答

天休哉至於耕藉儀注已詳於會典位有尊卑禮
無二致可彷彿其意而行之無所容其未議也
臣謹稽首而爲之說

先農說

總督

鄂爾泰

一 耜田之禮宜祀先農夫先農何神也始於何時神位宜何如書壇設何所涓吉何日陳設何器祭享何品樂奏何章既躬親其事敢不先考正其說試爲略言之古聖王之制祭祀也法施於民則祀之是故厲山氏之有天下也其子曰農能殖百穀周棄繼之故祀以爲稷此祀稷之始也共工氏之霸九州也其子曰后土能平九州故祀以爲社此祀社之始也而郊特牲稱天子大蜡八先嗇一神農也

建水州志

卷之十

奏議

四

司嗇二后稷之官也農三古之田畯有功於民者也郵表畷四郵亭之舍標表田畝田畯居之以督耕者也貓虎五貓食田鼠虎食田豕皆有功於稼者也防六水庸七防隄也以蓄水亦以障水庸溝也以受水亦以洩水皆農事之備也昆蟲八冥蝗之屬害稼者也是故蜡之祭有八皆以爲農而以先嗇爲主蓋以先農爲八神之主此祀農之始也班固食貨志又從而申其說曰闢土殖穀曰農炎帝

教民殖穀故號神農氏謂神其農業也又厲
山氏有子曰農能殖百穀後世因名耕甿曰
農其言農之義甚著而先農之稱考之於經
未有紀載惟劉向五經要義曰壇於田以祀
先農如社衛宏漢儀春始東耕於藉田引詩
先農則神農也魏秦靜議風伯雨師靈星先
農社穆爲國六神晉太始四年耕於東郊以
太牢祀先農周隋及唐所稱先農皆祭神農
於帝社配以后稷卽貞觀初太宗親耕東郊

建水州志

卷之十

奏議

三

仍藉田壇之名也垂拱中乃以藉田壇而爲
先農壇開元十九年祀神農之壇上以后稷
配二十三年親祀神農於東郊配以勾芒遂
躬耕盡隴上乾元二年詔去耒耕雕刻天子
出通化門釋輶而入壇遂祭神農以后稷配
冕而朱紱躬九推焉憲宗元和五年詔以來
歲正月藉田太常修撰韋公肅言藉田禮廢
久矣有司無可考乃據禮經參考開元乾元
故事爲先農壇於藉田此先農壇之所由來

也漢文帝紀二年春正月丁亥開藉田唐禮樂志春孟志亥享先農此春秋亥日祀先農之所由來也臣於是本之經佐之史核之國朝會典而爲之參酌其制卽如今之於神位也則書曰先農之神蓋以神農后稷皆各有所專祀而於此則統而書之也然以

頒示天下使農夫皆能曉其義則必實指其名而數之曰某某教農之君某某勸農之官也使農夫皆得津津口頰轉相稱誦愛慕嚮往

建水州志

卷之十

奏議

聖

而後其用力益勤則是先農之位宜主神農而配以后稷神農居中后稷居右皆南嚮田畷以下依八蜡之祀皆東西嚮比於兩廡之祀而位次正矣諸侯親耕於東郊則督撫以下之藉田皆宜在東郊先農壇在藉田之北壇門南向中爲先農壇壇高而方四面有階祭日奉神位以祀壇之後爲神庫如祭宗廟寢室之制以安神位壇之前旁爲瘞池以瘞毛血神庫之左爲神倉儲藉田之穀以供粢

盛酒醴神庫之右爲宰牲亭以供親割壇門外爲觀耕臺下爲藉田壇之旁別置齋室未祭而齋旣祭而燕皆於其地而壇基立矣古之躬耕在孟春元辰後之躬耕在孟春吉亥宗乎古則宜用元辰法乎近則宜用吉亥而涓吉定矣其在祭器則三爵一尊酒盞三十登一鉶二簠二簋二邊十豆十筐一俎一毛血盤一爐一燭臺二香案一祝板一而祭器備矣其在祭品天子則用太牢今督撫以下

建水州志

卷之十 奏議

四

惟用少牢餘無可減爵實以酒醴登實以太羹鉶實以和羹簠實以稷黍簋實以稻粱籩實以棗梨榛菱芡鹿脯白餅黑餅形鹽臠魚豆實以菁菹芹菹筍菹韭菹鹿醢兔醢魚醢醢醢脾肝肺胎筐實以青色量帛俎實以羊一豕一而品物齊矣若夫樂奏七章則以丁祭樂舞爲之舞佾如其數迎神奏永豐之章奠帛初獻奏時豐之章亞獻奏咸豐之章終獻奏大豐之章徹饌奏屢豐之章送神奏報

豐之章望瘞奏慶豐之章七闋既終而樂奏成矣未祭之先自齋宿以至於省牲省牲演禮演樂祭之日自迎神以至於初獻終獻送神望瘞悉如文廟之儀而大禮舉矣位次正而心不疑擅基立而地不遷涓吉定而時不忒祭器備而知其不可假易品物齊而知其不貴殊珍樂奏成而無有不和大禮舉而孰敢不敬而先農說於是乎畢

丁祭嚴飭碑文

總督鄂爾泰

建水州志

卷之十 碑文

聖

竊惟

至聖先師萬世之師表也冠帶集團橋

天子有臨雍之典春秋留仲月上丁修釋菜之儀內則命夫胃子三公外則寄於有司羣牧典綦嚴也誰敢懈焉本部院前蒞南藩職司秉鬯恭逢丁祭親齋沐而宿翼宮先令儒官較簿書而正祭器乃知牲或已經宰殺既失告全致潔之心物豈盡屬肥鮮更乖博碩蕃滋之義且或常供不充夫額數任先後以那移

珍品不給於豆籩致菹醢之雙疊兼聞各學
亦有同風罔知共竭精誠但解奉行故事甚
或尊罍未備疇詳犧象之形琴瑟雖陳莫辨
敲篪之狀觀者如牆如堵任彼咆哮祭者似
醉似癡頽如聾瞽一尊纔薦滿庭之燎火無
光三獻未終兩廡之燈輝已滅於是登鉞與
簋簋悉憑顛倒几筵鹿兔共榛菱似遇摩空
鸛雀分甘奪臙半由承祭之家人拍地喧天
邊問糾儀之齋長駿奔髦士霎時怒髮衝冠

建水州志

卷之十 碑文

哭

輿隸膳夫一片雄心染指凡此之類罪豈勝
誅皆由約束之不嚴亦以躬行之未善不思
王爵則身膺一命幸得窺聖人門牆分獻則
職任半瓊原以司泮宮俎豆平時未知化導
已蒙尸位之譏臨事不克恪恭難免曠官之
咎於是飭郡守州牧縣令等職兼以誠教授
學正訓導諸員各矢乃心以襄大典預期三
日牲牷皆供乎餼率先事一朝品物盡陳於
頌璧齋戒沐浴來觀習樂試歌舞於明倫堂

前料量潔清退服寢衣歛精神於尊經閣時
庶幾必誠必信斯夙夜之惟寅無怠無愆知
神人之感格是并申之條約用以頒諸學宮
業經江南各學遵照奉行在案今本部院蒞
任滇黔合行通飭為此仰各府州縣等官并
教授學正訓導諸員務須恪遵奉行今將條
約開列於左

一既奉

肇聖五王不惟簠簋豆籩照數增設卽牲牲亦應

建水州志

卷之十

碑文

七

各增其四有議共牲者其說不可從考之典
禮惟配享有可以共牲者專主無共牲之禮
書云文王騂牛一武王騂牛一其明徵也自
三代至漢唐皆不聞有共牲之說惟後漢有
青帝赤帝共一犢白帝黑帝共一犢者議者
非之唐開元時五品以上室異牲六品以下
共牲豈有王爵而可共牲者乎其各照數增
一爲五可也

一祭牲祭品皆有定額一豆一籩罔可缺遺

况牲取親割以告虔也取其毛血以告全也
可既宰而入學門乎豕曰剛鬣註謂其豕肥
則鬣剛羊曰柔毛註謂其羊肥則毛細而柔
弱此博碩肥膄之所由稱也可以瘦瘠不堪
之豕羊而飲之灌之以充牲牲乎既宰且不
可瘦瘠且不可况可缺其額數而肥吏胥之
囊橐乎月令曰犧牲毋用牝又曰命宰祝循
行犧牲視全具按芻豢瞻肥瘠察物色必比
類量大小視長短皆中度五者備當上帝其
饗註曰上帝且歆享之况羣神乎嗣後各官
俱須先三日親至學視牲牲如法然後稽其
數使人牧之以待先一夕親割吏雖奸其何
所施乎

建水州志

卷之十

碑文

吳

一丁祭先數日集樂舞生演習精熟先一日
與祭官親同往觀不得草率從事
一丁祭先一夕凡與祭官齊集學宮齋宿不
得有一員私宿本署

一丁祭之日庭燎燈燭務須光明如晝以俟

祭畢後已除神前燈燭之外卽官員不得各
自張燈

一丁祭之日櫺星門內不得容一閒雜人所
有事宜止許學書幹辦及小心謹慎門斗二
人或四人照管燈燭其官員僕從人等一概
於門外伺候萬無使僕從人持燈夾墊相隨
上殿及上兩廡之禮君師一體幸勿自取罪
戾以貽失禮之愆也

一丁祭之日既不許容一閒雜人自無有搶
奪祭燭及祭品之人倘或仍有潛匿門內乘
空搶奪者以盜賊論卽時擒獲解報以憑盡
法重究

建水州志

卷之十

碑文

完

一學宮之地聖賢靈爽所依不惟丁祭宜修
治肅清卽平日尤宜掃灑潔淨近每見黌宮
以內栽瓜種菜學圃成澆灌之場曝被晒衣
諸生絕往來之路甚至丹楹刻桷徒供蝙蝠
棲遲鳥革翬飛盡是鼯鼯巢穴蛛塵百斛廟
貌埋埃垢之中颺糞千箕腥穢聞宮牆之外

皆已安之若素久且習爲固然甚至先儒先賢兩廡之神牌倒置鄉賢名宦兩祠之神位傾頽非其子孫有誰咨問加之朽蠹若罔聞知凡爾學官所司何職卽諸門斗多亦奚爲嗣後教官不時巡察務令門斗分班輪值逐月掃除學宮之內不得容一毫塵埃庶亦無忝厥司也慎哉毋忽

